

四庫全書

集部

欽定四庫全書

集部

楊子雲集卷二


詳校官監察御史臣曹錫寶

檢討臣何思鈞覆勘

總校官進士臣朱鈐

校對官中書臣牛稔文

謄錄監生臣王宜



太玄圖

欽定四庫全書

揚子雲集卷二

漢 揚雄 撰

明 鄭樸 編

太玄經

玄都首序

馴乎玄渾行無窮正象天陰陽北叅以一陽乘一統萬
物資形方州部家三位疎成曰陳其九九以為數生贊

上羣網乃綜乎名八十一首歲事成貞盛哉日乎丙明
離章五色淳光夜則測陰晝則測陽晝夜之測或否或
臧陽推五福以類升陰幽六極以類降升降相關大貞
乃通經則有南有北緯則有西有東巡乘六甲與斗相
逢歷以記歲而百穀時雍

太玄經從中至增第一

三

一方一州
一部一家

中陽氣潛萌於黃宮信無在乎中初一

昆侖旁薄幽測曰昆侖旁薄思諸貞也次二神戰于玄其

陳陰陽測曰神戰于玄善惡并也次三龍出于中首尾信可
以為庸測曰龍出于中見其造也次四庠虛無因大受性命
否測曰庠虛無否不能大受也次五日正于天利以其辰作
主測曰日正于天貴當位也次六月闕其博不如開明于西
測日月闕其博明始退也次七酋酋大魁頤水包貞測曰
酋酋之包任臣則也次八黃不黃覆秋常測曰黃不黃失
中德也上九巔靈氣形反測曰巔靈之反時不克也

☳

一方一州
一部二家

周陽氣周神而反乎始物繼其彙初一還

于天心何德之潛否測曰還心之否中不怒也次二植
中樞周無隅測曰植中樞立督慮也次三出我入我吉
凶之魁測曰出我入我不可不懼也次四帶其鈎擊錘
以玉環測曰帶其鈎擊自約束也次五土中其廬設于
金輿厥戒渝測曰廬金戒渝小人不克也次六信周其
誠上通于天測曰信周其誠上通也次七豐淫見其朋
還于蒙不克從測曰豐淫見朋不能從也次八還遇躬
外其禍不大測曰還遇躬外禍不中也上九還于喪或

弃之行測曰還于喪其道窮也

䷛

一方一州
一部三家

礧陽氣微動動而礧礧物生之難也初一

黃純于潛不見其畛藏鬱于泉測曰黃純于潛化在嘖也次二黃不純屈于根測曰黃不純失中適也次三赤子扶扶元貞有終測曰赤子扶扶父母瞻也次四拔我不德以力不克測曰拔我德力不堪也次五拔車山淵宜于大人測曰拔車山淵大位力也次六將其車入于丘虛測曰將車入虛道不得也次七出險登丘或牽之

牛測曰出險登丘莫之伐也次八車不拔駢軸折測曰車不拔躬自賊也上九崇崇高山下有川波其人有輯航可與過其測曰高山大川不輯航不克也

三

一方一州
二部一家

閑陽氣閑于陰礧然物咸見閑初一蛇伏

于泥無雄有雌終莫受施測曰蛇伏于泥君不君也次二閑其藏固珍寶測曰閑其藏中心淵也次三關無鍵舍金管測曰關無鍵盜入門也次四拔我輓輒小得利小征測曰拔我輓輒貴以信也次五礧而閑而拔我姦

而非石如石厲測曰磳閑如石其敵堅也次六閑黃埃
席金第測曰閑黃埃以德固也次七阻阻閑于遽除或
寢之廬測曰阻阻之閑惡在舍也次八赤臭播關大君
不閑克國乘家測曰赤臭播關恐入室也上九閑門以
終虛測曰閑門以虛終不可實也

☳

二方一州
一部一家

少陽氣澹然施于淵物謙然能自載初一

冥自少眇于謙測曰冥自少不見謙也次二自少不至
懷其卹測曰自少不至謙不成也次三動載其得人主

之式測曰載其得人謙貞也次四貧貧或妄之振測曰
貧貧妄振不能守正也次五地自沖下于川測曰地自
沖人之所聖也次六少持滿今盛後傾測曰少持滿何
足盛也次七貧自究利用見富測曰貧自究富之聘也
次八貧不貧人莫之振測曰貧不貧何足敬也上九密
雨溟沐潤于枯瀆三日射谷測曰密雨射谷謙之靜也

☵

一方一州
二部三家

辰陽氣孚微物各乖離而觸其類初一虛

既邪心有傾測曰虛邪心傾懷不正也次二正其腹引

其背會貞測曰正其腹中心定也次三戾其腹正其背
測曰戾腹正背中外爭也次四夫妻反道維家之保測
曰夫妻反道各有守也次五東南射兕西北其矢測曰
東南射兕不得其首也次六準繩規矩不同其施測曰
準繩規矩乖其道也次七女不女其心予覆夫諱測曰
女不女大可醜也次八殺生相矢中和其道測曰殺生
相矢中為𦉳也上九倉靈之雌不同宿而離失則歲之
功乖測曰倉靈之雌失作敗也

三

一方一州
三部一家

上陽氣育物于下咸射地而登乎上初一

上其純心挫厥銛銛測曰上其純心和以悅也次二上

無根思登于天谷在于淵測曰上無根不能自治也次

三出于幽谷登于茂木思其珍穀測曰出谷登木知向

方也次四即上不貞無根繁榮字虛名測曰即上不貞

妄升也次五鳴鶴升自深澤階天不恁測曰鳴鶴不恁

有諸中也次六升于堂顛衣到裳廷人不慶測曰升堂

顛到失大衆也次七升于顛臺或柱之材測曰升臺柱

輔弗堅也次八升于高危或斧之梯測曰升危梯斧失士民也上九棲于菑初亡後得基測曰棲菑得基後得人也

☵

一方一州
三部二家

干陽氣扶物而鑽乎堅鈴然有穿初一丸

鑽鑽于內隙厲測曰丸鑽于內轉丸非也次二以微干正維用軌命測曰以微干正大諫微也次三箱鍵挈挈匪貞測曰箱鍵挈挈干祿回也次四干言入骨時貞測曰干骨之時直其道也次五蚩蚩干于丘飴或錫之坏

測曰蚩蚩之干錫不好也次六幹干于天貞馴測曰幹
干之貞順可保也次七何戟解解邁測曰何戟解解不
容道也次八赤舌燒城吐水于鉞測曰赤舌吐水君子
以解崇也上九干于浮雲從墜于天測曰干于浮雲乃
從天墜也

☵

一方一州
三部三家

姤陽氣彊內而弱外物咸扶姤而進乎大

初一自我匍匐好是宜德測曰匍匐宜德若無行也次
二熒姤括括不利有攸往測曰熒姤括括多欲往也次

三卉炎于疇宜于丘陵測曰卉炎丘陵短臨長也次四
疇于酒食肥無譽測曰疇于酒食仕無方也次五疇有
足託堅穀測曰疇有足位正當也次六獨疇逝逝利小
不利大測曰獨疇逝逝不可大也次七白日臨辰可以
卒其所聞測曰白日臨辰老得勢也次八蚤虱之疇厲
測曰蚤虱之疇不足賴也上九全疇蓁其首尾臨于淵
測曰全疇之蓁恐遇困也

三

一方二州
一部一家

羨陽氣贊幽推包羨爽未得正行初一羨

于初其次迂塗測曰羨于初後難正也次二羨于微克復可以為儀測曰羨微克復不遠定也次三羨迂塗不能直如測曰羨迂塗不能直行也次四羨權正吉人不幸測曰羨權正善反常也次五孔道夷如蹊路微如大輿之憂測曰孔道之夷奚不遵也次六大虛既邪或直之或翼之得夫夫測曰虛邪夫夫得賢臣也次七曲其故迂其塗厲之馴測曰曲其故為作意也次八羨其足濟于溝瀆面貞測曰羨其足避凶事也上九車軸折其

衡捫四馬就括高人吐血測曰軸折吐血終不可悔也

☱

二方二州
一部二家

差陽氣蠹闢于東帝由羣雍物差其容初

一微失自攻端測曰微失自攻人未知也次二寤其所
好將以致其所惡測曰寤其所好漸以差也次三其亡
其亡將至于暉光測曰其亡其亡震自衛也次四過小
善不克測曰過小善不能至大也次五過門折入得此
中行測曰過門折入近復還也次六大跌過其門不入
其室測曰大跌不入誠可患也次七累卵業業懼貞安

測曰累卵業業自危作安也次八足纍纍其步蹉躓輔
銘滅糜測曰足纍纍履禍不還也上九過其枯城或葉
青青測曰過其枯城改過更生也

䷗

一方二州
一部三家

童陽氣始窺物僮然咸未有知初一顛童

不寤會我蒙昏測曰童不寤恐終晦也次二錯于靈著
焯于龜資出泥入脂測曰錯著焯龜比光道也次三東
辰以明不能以行測曰東辰以明矣不逝也次四或後
前夫先錫之光測曰或後前夫先光大也次五蒙柴求

兇其德不美測曰蒙柴求兇得不慶也次六大開帷幕
以引方客測曰大開帷幕覽衆明也次七脩侏侏比于
朱儒測曰侏侏之脩無可為也次八或擊之或刺之脩
其玄鑿渝測曰擊之刺之過以衰也上九童虞觸犀灰
其首測曰童虞觸犀還自累也

三

一方二州
三部一家

增陽氣蕃息物則益增日宣而殖初一聞

貞增默外人不得測曰聞貞增默識內也次二不增其
方而增其光冥測曰不增其方徒飾外也次三木以止

漸增測曰木止漸增不可益也次四要不克或增之戴
測曰要不克可敗也次五澤庫其容衆潤攸同測曰澤
庫其容謙虛大也次六朱車燭分一日增我三千君子
慶小人傷測曰朱車之增小人不當也次七增其高刃
其削丘貞測曰增高刃峭與損皆行也次八兼貝以役
往益來黜測曰兼貝以役前慶後亡也上九崔嵬不崩
賴彼峽岬測曰崔嵬不崩羣士榑榑也

太玄經從銳至事第二

三三一方二州
二部二家
銳陽氣岑以銳物之生也咸專一而不二

初一蟹之郭索後蚓黃泉測曰蟹之郭索心不一也次
二銳一無不達測曰銳一之達軌道必也次三狂銳盪
測曰狂銳之盪不能處一也次四銳于時無不利測曰
銳于時得其適也次五銳其東忘其西見其背不見其
心測曰銳東忘西不能迴避也次六銳于醜含于五軌
萬鍾貞測曰銳于醜福祿不量也次七銳于利忝惡至
測曰銳于利辱在一方也次八銳其銳救其敗測曰銳

其銳恐轉作殃也上九陵崢岸峭陲測曰陵崢岸峭銳極必崩也

三三一方二州達陽氣枝條出物莫不達初一中冥獨

三部三家

達迴迴不屈測曰中冥獨達內曉無方也次二迷腹達目測曰迷腹達目以道不明也次三蒼术維流厥美可
以達于瓜苞測曰蒼术維流內恕以量也次四小利小
達大迷扁扁不故測曰小達大迷獨曉隅方也次五達
于中衢大小無迷測曰達于中衢道四通也次六大達

無畛不要止洩作否測曰大達無畛不可偏從也次七
達于砭割前亡後賴測曰達于砭割終以不廢也次八
迷目達腹測曰迷目達腹外惑其內也上九達于咎貞
終譽測曰達咎終譽善以道退也

☵

一方二州
三部一家

交陽交于陰陰交于陽物登明堂喬喬皇

皇初一冥交于神齊不以其貞測曰冥交不以懷非含
慙也次二冥交有孚明如測曰冥交之孚信接神明也
次三交于木石測曰交于木石不能嚮人也次四往來

熏熏得亡之門測曰往來熏熏與神交行也次五交于
鷲猩不獲其榮測曰交于鷲猩鳥獸同方也次六大圈
闕闕小圈交之我有靈穀與爾穀之測曰大小之交待
賢煥光也次七交于烏鼠費其資忝測曰交于烏鼠徒
費也次八戈矛往來以其貞不悔測曰戈矛往來征不
可廢也上九交于戰伐不貞覆于城猛則噉測曰交于
戰伐奚可遂也

三三

一方二州
三部二家

更陽氣能剛能柔能作能休見難而縮初

一赤卉方銳利進以退測曰赤卉方銳退以動也次二
更其心作疾測曰更其心中無勇也次三更其鄰守其
節雖勿肆終無拂測曰更其鄰體不可肆也次四更其
哇三歲不噉測曰更哇不噉時數失也次五黃菌不誕
俟于慶雲測曰黃菌不誕俟速耦也次六縮失時或承
之蓄測曰縮失時坐逋後也次七訕其節執其術共所
殞測曰訕節共殞內有主也次八竅枯木丁衝振其枝
小人有更三却鉤羅測曰竅木之振小人見侮也上九

悔縮往去來復測曰悔縮之復得在後也



一方二州
三部三家

僕陽氣有僕可以進而進物咸得其願初

一冥賊僕天凶測曰冥賊之僕時無吉也次二冥德僕
天昌測曰冥德之僕昌將日也次三僕後時測曰僕而
後之解也次四誣其角直其足維以僕穀測曰屈角直
足不伎刺也次五大爵集于宮庸小人庫僕空測曰宮
庸之爵不可空得也次六僕福貞貞食于金測曰僕福
貞貞正可服也次七僕禍介介凶人之郵測曰僕禍介

介與禍期也次八不禍禍僣天活我測曰禍不禍非厥
訖也上九僣僣天撲之顛測曰僣僣之撲終不可治
也

三

一方三州
一部一家

從陽躍于淵于澤于田于嶽物企其足初

一日幽嬪之月冥隨之基測曰日嬪月隨臣應基也次
二方出旭旭朋從爾醜測曰方出朋從不知所之也次
三人不攻之自牽從之測曰人不攻之自然證也次四
鳴從不臧有女承其血匡亡測曰鳴從之亡奚足朋也

次五從水之科滿測曰從水滿科不自越也次六從其目失其腹測曰從目失腹欲不從也次七拂其惡從其淑雄黃食肉測曰拂惡從淑救凶也次八從不淑禍飛不逐測曰從不淑禍不可訟也上九從徽徽後乃登于階終測曰從徽徽後得功也

☳

一方三州一部二家

進陽引而進物出溱溱開明而前初一冥

進否作退毋測曰冥進否邪作退也次二進以中刑大人獨見測曰進以中刑刑不可外也次三狂章章不得

中行測曰狂章章進不中也次四曰飛懸陰萬物融融
測曰飛懸陰君道隆也次五進以權疏或杖之扶測曰
進以權疏制于尊也次六進以高明受祉無疆測曰進
以高明其道迂也次七進非其以聽咎窒耳測曰進非
其以毀滋章也次八進于淵君子用船測曰進淵且船
以道行也上九逆憑山川三歲不還測曰逆憑山川終
不可長也

☰

一方三州
一部三家

釋陽氣和震圜照釋物成稅其枯而解其

甲初一動而無名酋測曰動而無名不可得名也次二動于響景測曰動于響景不足觀聽也次三風動雷興從其高崇測曰風動雷興動有為也次四動之丘陵失澤朋測曰動之丘陵失下危也次五和釋之脂四國之夷測曰和釋之脂民說無疆也次六震于廷喪其和貞測曰震于廷和正俱亡也次七震震不侮濯漱其詢測曰震震不侮解恥無方也次八震于利巔仆死測曰震于利與死偕行也上九今獄後穀終說桎梏測曰今獄

後穀于彼釋殃也

三

一方三州
二部一家

格陽氣內壯能格乎羣陰攘而却之初一

格內善失貞類測曰格內善不省也次二格內惡幽貞類測曰格內惡幽貞妙也次三裳格鑿鈎渝測曰裳格鑿鈎無以制也次四畢格禽鳥之貞測曰畢格禽正法位也次五膠漆釋弓不射角木離測曰膠漆釋信不結也次六息金消石往小來奕測曰息金消石美日大也次七格其珍類龜縞厲測曰格其珍類無以自匡也次

八格彼鞏堅君子得時小人剔憂否測曰格彼鞏堅誼
不得行也上九郭其目觶其角不庠其體撲測曰郭目
觶角還自傷也



一方三州
二部二家

夷陽氣傷剔陰無救癩物則平易初一載

幽貳執夷內測曰載幽執夷易其內也次二陰夷冒于
天罔測曰陰夷冒罔䟽不失也次三柔嬰兒于號三日
不嗷測曰嬰兒于號中心和也次四夷其牙或飫之徒
測曰夷其牙食不足嘉也次五中夷無不利測曰中夷

之利其道多也次六夷于廬其宅丘虛測曰夷于廬厥
德亡也次七榦柔榦弱離木共金夷測曰榦柔共金弱
勝彊也次八夷其角厲測曰夷其角以威傷也上九夷
于考利敬病年貞測曰夷考之貞懸車鄉也

三

一方三州
二部三家

樂陽始出與舒疊得以和淖物咸喜樂初

一獨樂款款及不遠測曰獨樂款款淫其內也次二樂
不知辰于天測曰樂不可知以時歲也次三不宴不雅
喙啞啞咋號吽倚戶測曰不宴不雅禮樂廢也次四拂

其繫絕其縲佚厥心測曰拂其繫絕縲心誠快也次五鐘鼓喑喑管絃濟濟或承之衰測曰鐘鼓喑喑樂後悲也次六大樂無間民神禽鳥之般測曰大樂無間無不懷也次七人喜鬼喜天要之期測曰人喜鬼喜稱樂畢也次八嘻嘻自懼亡彼愆虞測曰嘻嘻自懼終自保也上九極樂之幾不移日而悲則哭泣之嗟資測曰極樂之幾信可悔也

☳

一方三川
三部一家

爭陽氣氾施不偏不頗物與爭訟各遵其

儀初一爭不爭隱冥測曰爭不爭道之素也次二赫河
懼測曰赫河之懼何可愜也次三爭射齟齬測曰爭射
閭閻君子讓鄰也次四爭小利不酋貞測曰小利不絕
正道乃昏也次五爭于達利以無方測曰爭于達爭處
中也次六臂膊脛如股脚臍如維身之疾測曰臂脛如
股臣大隆也次七爭干及矛鞬用亨于王前行測曰干
矛之爭衛君躬也次八狼盈口夫在其後測曰狼盈口
不顧害也上九兩虎相牙知掣者全測曰兩虎相牙知

所制也



一方三州
三部二家

務陽氣勉務物咸若其心而總其事初一

始務無方小人亦用罔測曰始務無方非小人所理也

次二新鮮自求珍絜精其芳君子攸行測曰新鮮自求

光于己也次三不拘不掣其心腐且敗測曰不拘不掣

其體不全也次四見矢自升利羽之朋蓋戴車載測曰

矢及蓋厥道然也次五蜘蛛之務不如蠶之綸測曰蜘蛛

蛛之務無益人也次六華實芳若用則臧若測曰華芳

用臧利當年也次七喪其芳無攸往測曰喪其芳德以
衰也次八黃中免于禍貞測曰黃中免禍和以正也上
九務成自敗雨成自隊測曰務成自敗非厥命也



一方三州
三部三家

事陽氣大冒昭職物則信信各致其力初

一事無事至無不事測曰事無事以道行也次二事在
樞不咨不諉喪其哲符測曰不咨不諉其知亡也次三
時往時來間不容釐測曰時往時來不失趣也次四男
女事不代之字測曰男女事非厥務也次五事其事王

假之食測曰事其事職所任也次六任大自事方來不
救測曰任大自事奚可堪也次七丈人扶孤豎子提壺
測曰丈人扶孤小子知方也次八男女事十年不誨測
曰男女事終家不亨也上九到耳順止事貞測曰到耳
順止逆聞順行也

太玄經從更至應第三

☰

二方一州
一部一家

更陽氣既飛變勢易形物改其靈初一冥

化否貞若性測曰冥化否貞少更方也次二時七時九

軫轉其道測曰時七時九不失當也次三化白于泥溜
測曰化白于泥變不明也次四更之小得用無不利測
曰更之小得民所望也次五童牛角馬不今不古測曰
童牛角馬變天常也次六入水載車出水載杭宜于王
之更測曰車杭出入其道更也次七更不更以作病測
曰更不更能自臧也次八駟馬跂跂而更其御測曰駟
馬跂跂更御乃良也上九不終其德二歲見代測曰不
終之代不可長也



二方一州
一部二家

斷陽氣彊內而剛外動而能有斷決初一

斷心滅斧冥其繩矩測曰斷心滅斧內自治也次二冥
斷否在塞耳測曰冥斷否中心疑也次三決其聾聵利
以治穢測曰決其聾聵利有謀也次四斷我否食非其
有恥測曰斷我否食可恥也次五大腹決其股脫君子
有斷小人以活測曰大腹決脫斷得理也次六決不決
爾讎不閑乃後有鉞測曰決不決辜及身也次七庚斷
甲我心孔碩乃後有鏢測曰庚斷甲義斷仁也次八勇

侏之尙盜蒙決決測曰盜蒙之決妄斷也上九斧刃蛾
蛾利匠人之貞測曰蛾蛾之斧利征亂也

䷛

二方一州
一部三家

毅陽氣方良毅然敢行物信其志初一懷

威滿虛測曰懷威滿虛道德亡也次二毅于心腹貞測
曰毅于心腹內堅剛也次三戴威滿頭君子不足小人
有餘測曰戴威滿頭小人所長也次四君子說器其人
柔且毅測曰君子說器言有方也次五不田而穀毅于
棟祿測曰不田而穀食不當也次六毅于棟柱利安大

主測曰毅于棟柱國任彊也次七觥羊之毅鳴不類測
曰觥羊之毅言不法也次八毅于禍貞君子攸名測曰
毅于禍貞不可幽部也上九豨毅其牙發以張弧測曰
豨毅其牙吏所獵也

三

二方一州
二部一家

裝陽氣雖大用事微陰據下裝而欲去初

一幽裝莫見之行測曰幽裝莫見心已外也次二鵝鵝
慘于冰翼彼南風內懷其乘測曰鵝鵝之慘懷憂無快
也次三往其志或承之喜測曰往其志遇所快也次四

鷄雞朝飛踣于北嚶嚶相和不輟食測曰鷄雞朝飛何足賴也次五鴻裝于溜飲食頤頤測曰鴻裝于溜大將得志也次六經衢周九路不限其行覆測曰經六衢商旅事也次七裝無讎利征咎測曰裝無讎禍且至也次八季仲播軌泣于之道用送厥往測曰季仲播軌送其死也上九裝于昏測曰裝于昏尚可避也

☳

二方一州
二部二家

衆陽氣信高懷齊萬物宣明媿大衆多初一冥兵始火入耳農輟馬穀尸將班于田測曰冥兵之

始始則不臧也次二兵無刃師無陳麟或賓之溫測曰
兵無刃德服無方也次三軍或纍車丈人摧拏內蹈之
瑕測曰軍或纍車廟戰內傷也次四虎虓振廠豹勝其
祕否測曰虎虓振廠如鷹之揚也次五踳戰啗啗若能
若螭測曰踳戰啗啗恃力作王也次六大兵雷霆震其
耳維用誣腹測曰大兵雷霆威震無疆也次七旌旗絺
羅干戈蛾蛾師孕言之哭且暵測曰旌旗絺羅大恨民
也次八兵衰衰見其病不見輿尸測曰兵衰衰不血刃

也上九斧刃闕其柯折可以止不可以伐往血測曰刃闕柯折將不足往也

䷗

二方一州
三部三家

密陽氣親天萬物丸蘭咸密無間初一窺

之無間大幽之門測曰窺之無間密無方也次二不密不比我心即次測曰不密不比違厥鄉也次三密于親利以作人測曰密于親為利臧也次四密于腥臊三日不覺散測曰密于腥臊小惡通也次五密密不罅孺于天測曰密密不罅並天功也次六大惡之比或益之恤

測曰大惡之比四異同也次七密有口小鯰大君在無
後測曰密口小鯰賴君逢也次八琢齒依齧三歲無君
測曰琢齒依齧君自拔也上九密禍之比先下後得其
死測曰密禍之比終不可奪也

☵

二方一州
三部一家

親陽方仁愛全真敦篤物咸親睦初一親

非其膚其志齧齧測曰親非其膚中心閒也次二孚其
肉其志資戚測曰孚其肉人莫聞也次三螟蛉不屬蝶
羸取之不迓侮測曰螟蛉不屬失其體也次四賓親于

禮飲食几几測曰賓親于禮賓主偕也次五厚不厚比
人將走測曰厚不厚失類無方也次六厚厚君子秉斗
測曰厚厚君子得人無疆也次七高亢其位庫于同事
測曰位高事卑德不能也次八肺附乾餼其幹已良君
子攸行測曰肺附之行不我材也上九童親不貞測曰
童親不貞還自茲也

䷋

二方一州
三部二家

斂陽氣大滿于外微陰小斂于內初一小

斂不貸利用安人正國測曰小斂不貸其道當也次二

墨斂籤籤窳我匪貞測曰墨斂籤籤非所以光也次三見小勿用以我扶疏測曰見小勿用俟我大也次四斂利小刑小進大退測曰斂利小刑其正退也次五畜槃而衍繭純于田測曰畜槃繭純不奪時也次六閔而縣而作大元而小人不戒測曰閔縣之戒不識微也次七夫牽于車妻為剝茶利于王姑不利公家病測曰牽牛剝茶斂之資也次八大斂大巔測曰大斂之巔所斂非也上九斂于時利圉極菑測曰斂于時奚可幾也



二方一州
三部三家

彊陽氣統剛乾乾萬物莫不彊梁初一彊

中否貞無攸用測曰彊中否貞不可與謀也次二鳳鳥
于飛脩其羽君子于辰終莫之圉測曰鳳鳥于飛君子
得時也次三柱不中梁不隆大厦微測曰柱不中不能
正基也次四爰聰爰明左右榑榑測曰爰聰爰明庶士
方來也次五君子彊梁以德小人彊梁以力測曰小人
彊梁得位益尤也次六克我彊梁于天無彊測曰克我
彊梁大美無基也次七金剛肉柔血流于田測曰金剛

肉柔法太傷也次八彊其衰勉其弱測曰彊其衰勉自
彊也上九泰山拔梁柱折其人顛且蹶測曰山拔梁折
終以猛也

三

二方二州
一部一家

睽陽氣灼睽清明物咸重光保厥昭陽初

一睽于內清無穢測曰睽于內清無穢也次二冥駁冒
睽睽于中測曰冥駁冒睽中自應也次三目上于天耳
下于淵恭測曰目上耳下聰察極也次四小人慕睽失
祿貞測曰小人慕睽道不得也次五睽于幽黃元貞無

方測曰睟于幽黃正地則也次六大睟承愆易測曰大
睟承愆小人不克也次七睟辰愆君子補愆測曰睟辰
愆善補過也次八睟惡無善測曰睟惡無善終不可佐
也上九睟終永初貞測曰睟終之貞誠可嘉也

☵

二方二州
一部二家

盛陽氣隆盛充塞物寔然盡滿厥意初一

盛不墨失冥德測曰盛不墨中不自克也次二作不恃
克大有測曰作不恃稱玄德也次三懷利滿匈不利于
公測曰懷利滿匈營私門也次四小盛臣臣大人之門

測曰小盛臣臣事仁賢也次五何福滿肩提禍揮揮測
曰何福提禍小人之道也次六天錫之光天開之疆于
謙有慶測曰天錫之光謙大有也次七乘火寒泉至測
曰乘火泉至禍不遠也次八挹于滿熒幾後之傾測曰
挹于滿幾危也上九極盛不救禍降自天測曰極盛不
救天道反也

三

二方二州
一部三家

居陽方躔膚赫赫為物城郭物咸得度初

一匪譽匪咎克守厥家測曰匪譽匪咎其道常也次二

家無壺婦承之姑或洗之塗測曰家無壺無以相承也
次三長幼序序子克父測曰子克父乃能有興也次四
見豕在堂狗繫之遠測曰見豕在堂其體不慶也次五
舳艫調安利富貞測曰舳艫安和順其疆也次六外其
井竈三歲見背測曰外其井竈三歲不享也次七老夫
擐車少女提壺利考家測曰老父擐車其體乃莊也次
八反其几雙其牝几家不旨測曰反几雙牝家用不臧
也上九株生蘖其種不絕測曰株生蘖其類乃長也

三

二方二州
二部一家

法陽高縣厥法物仰其墨莫不被則初一

造法不法測曰造法不法不足用也次二摹法以中克

測曰摹法以中衆之所共也次三準繩不甫亡其規矩

測曰準繩不甫其用與也次四準繩規矩莫違我施測

曰準繩規矩由身行也次五繡陸併寘腹并潢洋終

不得食測曰併寘腹非學方也次六于紀于綱示以貞

光測曰于紀于綱大統明也次七密網離于淵不利于

麟測曰密網離淵苛法張也次八正彼有辜格我無邪

測曰正彼有辜毆而至也上九井無幹水直衍匪谿匪
谷終于愆測曰井無幹法妄恣也

三

三方二州
二部二家

應陽氣極于上陰信萌乎下上下相應初

一六幹羅如五枝離如測曰幹羅如附離君也次二上
歷施之下律和之非則否測曰上施下和非其肯也次
三一從一橫天網罨罨測曰一從一橫經緯陳也次四
援我罨罨絺羅于野至測曰援我罨罨不能以仁也次
五龍幹于天貞粟其鱗測曰龍翰之粟極懼墜也次六

熾承于天冰萌于地測曰承天萌地陽始退也次七日
彊其衰應蕃貞測曰日彊其衰惡敗類也次八極陽
徵陰不移日而應測曰極陽徵陰應其發也上九元離
之極君子應以大稷測曰元離之極不可遏止也

太玄經從迎至昆第四

三二方二州
三部三家迎陰氣成形乎下物咸遡而迎之初一迎

他匪應無貞有邪測曰迎他匪應非所與并也次二蛟潛
於淵陵卵化之人或陰言百姓和之測曰潛蛟之化中

精誠也次三精微往來妖先靈覺測曰精微往來妖咎
徵也次四裳有衣襦男子目珠婦人唳鈎貞測曰裳有
衣襦陰感陽也次五黃乘否貞測曰黃乘否貞不可與
朋也次六玄黃相迎其意感感測曰玄黃相迎以類應
也次七遠之眊近之梧迎父迎迨測曰遠眊近梧失父
類也次八見血入門拊迎中庭測曰見血入門以賢自
衛也上九溼迎牀足罽于牆屋測曰溼迎牀足願在內
也

三三二方二州遇陰氣始來陽氣始往往來相逢初一幽

三部一家

遇神及師夢貞測曰幽遇神思得理也次二衝衝兒遇
不受定之諭測曰衝衝兒遇不肖子也次三不往來不
求得士女之貞測曰不往不求士女則也次四個個兌
人遇雨厲測曰兌人遇雨還自賊也次五田遇禽人莫
之禁測曰田遇禽誠可勉也次六俾蛛罔罔遇冬蝨利雖
大不得從測曰蛛之罔害不遠也次七振其角君父遇
辱匪正命測曰振其角直道行也次八兩兇鬪一角亡

不勝喪測曰兩兕鬪亡角喪也上九觝其角遇下毀足
測曰觝其角何可當也

三三二方二州
三部二家

竈陰雖沃而灑之陽猶執而餼之初一竈

無實乞于鄰測曰竈無有虛名也次二黃鼎介其中齋
不飲不食字無害測曰黃鼎介中廉貞也次三竈無薪
黃金瀕測曰竈無薪有不用也次四鬲實之食得其勞
力測曰鬲實之食時我奉也次五鼎大可觴不齊不莊
測曰鼎大可觴饗無意也次六五味餼調如美如大人

之饗測曰味酥之饗宰輔事也次七脂牛正肪不濯釜而烹則歐歐之疾至測曰脂牛歐歐不絜志也次八食其委雖噉不毀測曰食其委蒙厥德也上九竈滅其火唯家之禍測曰竈滅其火國之賊也

☰☷ 二方二州
☰☷ 三部三家 大陰虛其內陽逢其外物與盤蓋初一淵

潢洋包無方冥測曰淵潢洋資裹無方也次二大其慮躬自鑣測曰大其慮為思所傷也次三大不大利以成大測曰大不大以小作基也次四大其門郊不得其刀

鳴虛測曰大其門郊實去名來也次五包荒以中克測
曰包荒以中督九夷也次六大失小多失少測曰大失
小禍由微也次七大奢透自削以觚或益之舖測曰奢
透自削能自非也次八豐牆峭趾三歲不築崩測曰豐
牆之峭崩不遲也上九大終以蔑否出天外測曰大終
以蔑小為大質也

三

二方三州
一部一家

廓陰氣應而愈之陽猶恢而廓之初一廓

之恢之不正其基測曰廓之恢之始基傾也次二金榦

玉楨廓干城測曰金榦玉楨蕃輔正也次三廓無子室
石婦測曰廓無子焉得後生也次四恢其門戶以御寇
虜測曰恢其門戶大經營也次五天門大開恢堂之階
或生之差測曰天門大開德不能滿堂也次六維豐維
崇百辟馮馮伊德攸興測曰維豐維崇茲太平也次七
外大挖其中失君子至野小人入室測曰外大挖中無
人也次八廓其外虛其內利鼓鉦測曰廓外虛內乃能
有聞也上九極廓于高庸三歲無童測曰極廓高庸終

無所臣也

三二方三州
一部二家

文陰斂其質陽散其文文質班班萬物粲

然初一袷禛何縵玉貞測曰袷禛何縵文在內也次二
文蔚質否測曰文蔚質否不能俱睟也次三大文彌樸
字似不足測曰大文彌樸質有餘也次四斐如邠如虎
豹文如匪天之享否測曰斐邠之否奚足譽也次五炳
如彪如尚文昭如車服庸如測曰彪如在上天文炳也
次六鴻文無范恣于川測曰鴻文無范恣意往也次七

雉之不祿而難蓋穀測曰雉之不祿難幽養也次八彫
籤穀布亡于時文則亂測曰彫籤之文徒費日也上九
極文密密易以黼黻測曰極文易當以質也

☵

二方三州
一部三家

禮陰在下而陽在上上下正體物與有禮

初一履于跂後其祖禰測曰履于跂退其親也次二目
穆穆足肅肅乃貫以棘測曰穆穆肅肅敬出心也次三
畫象成形字無成測曰畫象成形非其真也次四孔鴈
之儀利用登于階測曰孔鴈之儀可法則也次五懷其

違折其七過喪錫九天測曰懷違折七貶天祿也次六
魚鱗差之乃矢施之帝用登于天測曰魚鱗差之貴賤
位也次七出禮不畏入畏測曰出禮不畏人所棄也次
八冠戚肱履全履測曰戚肱明不可上也上九戴無首
馬用此九測曰無首之戴馬所往也

三

二方三州
二部一家

逃陰氣章彊陽氣潛退萬物將亡初一逃

水之夷滅其創迹測曰逃水之夷跡不創也次二心惕
惕足金烏不志溝壑測曰心惕惕義不將也次三兢其

股鞭其馬寇望其戶逃利測曰兢股鞭馬近有見也次
四喬木維樅飛鳥過之或降測曰喬木之鳥欲止則降
也次五見鷺踣于林獺入于淵征測曰見鷺及獺深居
逃凶也次六多田不婁費我朕功測曰多田不婁費力
忘功也次七見于纍後乃克飛測曰見于纍幾不足高
也次八頸加于矰維紉其繩測曰頸加維紉無自勞也
上九利逃跣跣盜德嬰城測曰盜德嬰城何至逃也

三三二方三州
二部二家

唐陰氣茲來陽氣茲往物且盪盪初一唐

于內勿作厲測曰唐于內無執守也次二唐處冥利用
東征測曰唐冥之利利明道也次三唐素不貞亡彼瓏
玲測曰亡彼瓏玲非爾所也次四唐無適道義之辟測
曰唐無適惟義予也次五奔鹿懷鷗得不訾測曰奔鹿
懷鷗奚足功也次六唐不獨足代天班祿測曰唐不獨
足無私容也次七弋彼三飛明明于征終日不歸亡測
曰弋彼三飛適無所從也次八唐收祿社鬼輟哭或得
其沐測曰唐收祿復亡也上九明珠彈于飛肉其得不

復測曰明珠彈肉費不當也

三三二方三州常陰以知臣陽以知辟君臣之道萬世不

三部三家

易初一戴神墨履靈式以一耦萬終不稷測曰戴神墨
體一形也次二內常微女貞厲測曰內常微女不正也
次三日常其德三歲不食測曰日常其德君道明也次
四月不常或失之行測曰月不常臣失行也次五其從
其橫天地之常測曰其從其橫君臣常也次六得七而
九懦撓其剛不克常測曰得七而九弃盛而衰也次七

滔滔往來有常衰如克承貞測曰滔滔往來以正承非也次八常疾不疾咎成不詰測曰常疾不疾不能自治也上九疾其疾巫醫不失測曰疾其疾能自醫也

☵

三方三州
三部一家

度陰氣日躁陽氣日舍躁躁舍舍各得其

度初一中度獨失測曰中度獨失不能有成也次二澤不舍冥中度測曰澤不舍乃能有正也次三小度差差大櫛之階測曰小度之差大度傾也次四榦榦利干城測曰榦榦之利利經營也次五榦不榦櫛于營測曰榦不

幹不能有寧也次六大度檢檢于天示象垂其范測曰
大度檢檢垂象貞也次七不度規之鬼即訾之測曰不
度規之明察笑也次八石赤不奪節士之必測曰石赤
不奪可與有要也上九積善之貸十年不復測曰積善
之貸不得造也

三三 二方三州
三部二家

永陰以武取陽以文與道可長久初一不

替不爽長子之常測曰不替不爽永宗道也次二內懷
替爽永失貞祥測曰內懷替爽安可久也次三永其道

未得無咎測曰永其道誠可保也次四子序不序先賓
永失主測曰子序不序非永方也次五三綱得于中極
天永厥福測曰三綱之永其道長也次六大永于福反
虛庭入首冥測曰大永于福福反亡也次七老木生蔭
永以纏其所無測曰老木生蔭永厥體也次八永不軌
凶亡流于後測曰永不軌其命劑也上九永終馴首測
曰永終馴首長愷悌也



三方三州
三部三家

昆陰將離之陽尚昆之昆道尚同初一昆

于黑不知白測曰昆于黑不可謂人也次二白黑菲菲
三禽一角同尾測曰三禽一角無害心也次三昆于白
失不黑無除一尾三角測曰昆白不黑不相親也次四
烏託巢于叢人寄命于公測曰烏託巢公無貧也次五
穀不穀失疏數衆蹙毀玉測曰穀失疏數奚足旬也次
六昆于井市文車同軌測曰昆于井市同一倫也次七
蓋偏不覆晏雨不救測曰蓋偏不覆德不均也次八昆
于危難乃覆之安測曰危難之安素施仁也上九昆于

死弃寇遺測曰昆于死弃厥身也

太玄經從減至晦第五

三

三方一州
一部一家

減陰氣息陽氣消陰盛陽衰萬物以微初

一善減不減冥測曰善減不減常自沖也次二心減自
中以形于身測曰心減形身困諸中也次三減其儀利
用光于階測曰減其儀欲自禁也次四減于乂貶其位
測曰減于乂無以莅衆也次五減其黃貞下承于上寧
測曰減黃貞臣道丁也次六幽闡積不減不施石測曰

幽闡不施澤不平也次七減其疾損其卹厲不至測曰
減其疾不至危也次八瀏漣漣減于生根測曰瀏漣之
減生根毀也上九減終利用登于西山臨于大川測曰
減終之登誠可為也

☵

三方一州一部二家

陰不之化陽不之施萬物各陰初一陰不

予丈夫婦處測曰陰不予人所違也次二陰于血資乾
骨測曰陰于血臞自肥也次三貌不交喙噤陰無辭測
曰貌不交人道微也次四陰其穀不振不俗累老及族

測曰噍其穀不得相希也次五不中不督腐蠹之嗇測
曰不中不督其噍非也次六泉源洋洋噍于丘園測曰
泉源之噍不可譏也次七噍于體黃肉毀測曰噍于體
骨肉傷也次八噍遇禍禱以牛解測曰噍遇禍大費當
也上九噍不雨孚乾脯測曰噍不雨何可望也

☵

三方一州
一部三家

守陰守戶陽守門物莫相干初一閉朋牖

守元有測曰閉朋牖善持有也次二迷自守不如一之
有測曰迷自守中無所以也次三無喪無得往來默默

測曰無喪無得守厥故也次四象艮有守測曰象艮之
守廉無恚也次五守中以和要侯貞測曰守中以和侯
之素也次六車案軻圭璧塵測曰車案軻不接鄰也次
七羣陽不守男子之貞測曰羣陽之守守貞信也次八
白無杵其碓舉天陰不雨白日毀暑測曰白無杵其守
貧也上九與茶有守辭于盧首不殆測曰與茶有守故
愈新也

☵

三方一州
二部一家

翁陰來逆變陽往順化物退降集初一狂

衝于冥翕其志雖欲逍遙天不之茲測曰狂衝于冥天
未與也次二翕冥中射貞測曰翕冥中正予也次三翕
食嘍嘍測曰翕食嘍嘍利如舞也次四翕其羽利用舉
測曰翕其羽朋友助也次五翕其腹辟金穀測曰翕其
腹非所以舉也次六黃心鴻翼翕于天測曰黃心鴻翼
利得輔也次七翕繳惻惻測曰翕繳惻惻被離害也次
八揮其孛絕其縉殆測曰揮孛絕縉危得遂也上九擢
其角維用抵族測曰擢其角殄厥類也

☵☵ 三方一州
☶☶ 二部二家

聚陰氣收聚陽不禁禦物相宗聚初一鬼

神以無靈測曰鬼神無靈形不見也次二燕聚嘻嘻測
曰燕聚嘻嘻樂淫衍也次三宗其高年羣鬼之門測曰
宗其高年鬼待敬也次四牽羊示于叢社執圭信辟其
左股野測曰牽羊于叢不足勞也次五鼎血之猶九宗
之好乃後有孚測曰鼎血之猶信王命也次六畏其鬼
尊其禮狂作昧淫亡測曰畏鬼之狂過其正也次七竦
萃于丘冢測曰竦萃丘冢禮不廢也次八鳴鳩在林啜

彼衆禽測曰鴝鳩在林衆所咬也上九垂涕纍臯聚家
之彙測曰垂涕纍臯時命絕也

䷛

三方一州
二部三家

積陰將大閉陽尚小開山川藪澤萬物攸

歸初一冥積否作明基測曰冥積否在惡也次二積不
用而至于大用君子介心測曰積不用不可規度也次
三積石不食費其勞力測曰積石不食無可獲也次四
君子積善至于車耳測曰君子積善至于蕃也次五藏
不滿盜不羸測曰藏滿盜羸還自損也次六大滿碩施

得人無亢測曰大滿碩施人所來也次七魁而顏而玉帛班而決欲收寇測曰魁而顏而盜之招也次八積善辰禍維先之罪測曰積善辰禍非己辜也上九小人積非至于苗裔測曰小人積非禍所散也

三

三方一州
三部一家

飾陰白陽黑分行其職出入有飾初一言

不言不以言測曰言不言默而信也次二無質飾先文後失服測曰無質先文失貞也次三吐黃曾舌拮黃聿利見哲人測曰舌聿之利利見知人也次四利口哇哇

商人之貞測曰哇哇之貞利于商也次五下言如水實以天牝測曰下言之水能自沖也次六言無追如抑亦飛如大人震風測曰言無追如抑亦揚也次七不丁言時微于辭見上疑測曰不丁言時何可章也次八螯鳴喁喁血出其口測曰螯鳴喁喁口自傷也上九白舌于于屈于根君子否信測曰白舌于于誠可長也



三方一州疑陰陽相噬物成彫離若是若非初一疑三部二家

惴惴失貞夫測曰疑惴失貞何可定也次二疑自反孚

不遠測曰疑自反反清靜也次三疑彊昭受茲閔閔于其心祖測曰疑彊昭中心冥也次四疑考舊遇貞孚測曰疑考舊先問也次五赫黃疑金中測曰赫黃疑中邪奪正也次六誓貞可聽疑則有誠測曰誓貞可聽明王命也次七鬼魂疑貞厲嘍鳴戈木之烏射穴之狐反自耳厲測曰鬼魂之疑誠不可信也次八顛疑遇幹客三歲不射測曰顛疑遇客甚足敬也上九九疑無信控弧擬廩無測曰九疑無信終無所名也



三方一州
三部三家

視陰成魄陽成妣物之形貌咸可視初一

內其明不用其光測曰內其明白窺深也次二君子視
內小人視外測曰小人視外不能見心也次三視其德
可以幹王之國測曰視德之幹乃能有全也次四粉其
題頰雨其渥須視無姝測曰粉題雨須不可忍瞻也次
五鸞鳳粉如厥德暉如測曰鸞鳳粉如德光皓也次六
素車翠蓋維視之害貞測曰素車翠蓋徒好外也次七
視其瑕無穢測曰視其瑕能自矯也次八翡翠于飛離

其翼狐鼯之毛躬之賊測曰翡翠狐鼯好作咎也上九日沒其光賁于東方用視厥始測曰日沒賁東終顧始也

☵

三方二州
一部一家

沈陰懷于陽陽懷于陰志在玄宮初一沈

耳于閨不聞貞測曰沈耳于閨失德體也次二沈視自見贖於眇之盼測曰沈視之見得正美也次三沈于美失貞夫測曰沈于夫作聾盲也次四宛雛沈視食苦貞測曰宛雛沈視擇食方也次五雕鷹高翔沈其腹好媿

惡粥測曰雕鷹高翔在腐糧也次六見票如果明利以
正于王測曰見票如累其道明也次七離如婁如赤肉
鴟梟厲測曰離婁赤肉食不臧也次八盼得藥利征測
曰盼得其藥利征邁也次九血如剛沈于額前尸後喪
測曰血剛沈額終以貪敗也

三

三方二州
一部二家

內陰去其內而在于外陽去其外而在乎

內萬物之既初一謹于嬰執初貞後寧測曰謹于嬰執
始女貞也次二邪其內主迂彼黃牀測曰邪其內主遠

乃寧也次三爾儀而悲坎我西階測曰爾儀而悲代母情也次四好小好危喪其緼袍厲測曰好小好危不足榮也次五龍下于泥君子利用取娶遇庸夷測曰龍下于泥陽下陰也次六黃昏于飛內其羽雖欲滿宮不見其女測曰黃昏內羽不能自禁也次七枯垣生莠確頭內其雉婦有測曰枯垣生莠勿慶類也次八內不克婦荒家及國涉深不可測測曰內不克婦國之孽也上九雨降于地不得止不得過測曰雨降于地澤節也

三

三方二州
一部三家

去陽去其陰陰去其陽物咸個倡初一去

此靈淵舍彼枯園測曰去此靈淵不以謙將也次二去
彼枯園舍下靈淵測曰舍下靈淵謙道光也次三高其
步之堂有露測曰高步有露妄升也次四去于父子去
于臣主測曰去于父子非所望也次五擻其衣之庭有
麋測曰擻衣有麋亦可懼也次六躬去于成天遺厥名
測曰躬去于成讓不居也次七去其德貞三死不令測
曰去其德貞終死醜也次八月高弦火幾縣不可以動

動有愆測曰月弦火縣恐見咎也上九求我不得自我西北測曰求我不得安可久也

☵☵

三方二州
二部一家

晦陰登于陽陽降于陰物咸喪明初一同

冥獨見幽貞測曰同冥獨見中獨昭也次二盲征否測曰盲征否明不見道也次三陰行陽從利作不凶測曰陰行陽從事必外也次四晦其類失金匱測曰晦其類法度廢也次五日正中月正隆君子自晦不入窮測曰日中月隆明恐挫也次六玄鳥維愁明降于幽測曰玄

烏維愁將下昧也次七眇提明德或遵之行測曰眇提明德將遵行也次八視非其直夷其右目滅國喪家測曰視非夷目國以喪也上九晦冥冥利于不明之貞測曰晦冥之利不得獨明也

太玄經從魯至養第六

三三 三方二州
二部二家 魯陰征南陽征北物失明貞莫不魯魯初

一魯復睽天不覩其軫測曰魯復睽天無能見也次二明復睽天覩其根測曰明復睽天中獨爛也次三師或

導射豚其埠測曰師或導射無以辨也次四鑿貞不迷
于人攸資測曰鑿貞不迷誠可信也次五倍明佞光觸
蒙昏測曰倍明佞光人可頻也次六普普之離不宜焚
且妮測曰普普之離中夢夢也次七普好明其所惡測
曰普好之惡著不可昧也次八昏辰利于月小貞未及
星測曰昏辰利月尚可願也上九時騷騷不獲其嘉男
子折筭婦人易寄測曰不獲其嘉男死婦歎也

☵

三方二州
二部三家

窮陰氣塞宇陽亡其所萬物窮遠初一窮

其窮而民好中測曰窮其窮情在中也次二窮不窮而
民不中測曰窮不窮詐可隆也次三窮思達測曰窮思
達師在心也次四土不和木科楸測曰土不和病乎民
也次五羹無糝其腹坎坎不失其範測曰羹無糝猶不
失其正也次六山無角水無鱗困犯身測曰山無角困
百姓也次七正其足蹠于狴獄三歲見錄測曰正其足
險得平也次八涉于霜雪纍項于郟測曰纍項于郟亦
不足生也上九破壁毀圭曰竈生龜天禍以他測曰破

璧毀圭逢不幸也

☵

三方二州
三部一家

割陰氣割物陽形縣殺七日幾絕初一割

其耳目及其心腹厲測曰割其耳目中無外也次二割
其眈贅利以無穢測曰割其眈贅惡不得大也次三割
鼻食口喪其息主測曰割鼻喪主損無榮也次四宰割
平平測曰宰割平平能有成也次五割其股肱喪其服
馬測曰割其股肱亡大臣也次六割之無創飽于四方
測曰割之無創道可分也次七紫蜺喬雲朋圍日其疾

不割測曰紫蜺喬雲不知刊也次八割其蠹得必疾測
曰割其蠹國所便也上九割肉取骨滅頂于血測曰割
肉滅血不能自全也

三三三方二州
三三三三
三部二家

止陰大止物于上陽亦止物于下上下俱

止初一止于止內明無咎測曰止于止智足明也次二

車軻俟馬會止測曰車軻馬止不可以行也次三關其

門戶用止狂蠱測曰關其門戶禦不當也次四止于童

木求其疏穀測曰止于童木求其窮也次五柱奠廬蓋

蓋車穀均疏測曰柱及蓋穀貴中也次六方輪廣軸坎
軻其輿測曰方輪坎軻還自震也次七車繫其僂馬獵
其蹄止貞測曰車繫馬獵行可鄰也次八弓善反弓惡
反善馬恨惡馬恨絕弮破車終不偃測曰反弓馬恨終
不可以也上九折于株木較于砭石止測曰折木較石
君子所止也

䷋

三方二州
三部三家

堅陰形胼冒陽喪其緒物競堅彊初一磐

石固內不化貞測曰磐石固內不可化也次二堅白玉

形內化貞測曰堅白玉形變可為也次三堅不凌或泄
其中測曰堅不凌不能持齊也次四小螽營營蟬其翊
翊不介在堅蟬測曰小螽營營固其氏也次五翊大蟬
小虛測曰翊大蟬小國虛空也次六載蟬紗縣于九
州測曰載蟬之縣民以康也次七堅顛觸冢測曰堅顛
觸冢不知所行也次八悃堅禍維用解豸之貞測曰悃
堅禍用直方也上九螽焚其翊喪于尸測曰螽焚其翊
所憑喪也

☰

三方三州
一部一家

成陰氣方消陽藏于靈物濟成形初一成若

否其用不已冥測曰成若否所以不敗也次二成微改
改未成而殆測曰成微改改不能自遂也次三成躍以
縮成飛不遂測曰或躍以縮成德壯也次四將成矜敗
測曰將成之矜成道病也次五中成獨督大測曰中成
獨督能處中也次六成魁瑣以成獲禍測曰成之魁瑣
不以讓也次七成闕補測曰成闕之補固難承也次八
時成不成天降亡貞測曰時成不成獨失中也上九成

窮入于敗毀成君子不成測曰成窮以毀君子以終也

䷗

三方三州
一部二家

闕陰陽交跌相闕成一其禍泣萬物初一

圓方杌柢其內竅換測曰圓方杌柢內相失也次二闕

無間測曰無間之闕一其二也次三龍襲非其穴光亡

于室測曰龍襲非穴失其常也次四臭肥滅臯利美貞

測曰滅臯之貞沒所勞也次五齧骨折齒滿缶測曰齧

骨折齒大貪利也次六飲汗吮得其膏滑測曰飲汗

吮吮道足嗜也次七闕其差前合後離測曰闕其差其

合離也次八輔其折虛其缺其人暉且偈測曰輔折虛
缺猶可善也上九陰陽啓昏其變赤白測曰陰陽啓昏
極則反也

䷗

三方三州
一部三家

失陰大作賊陽不能得物陷不測初一刺

虛滅刃測曰刺虛滅刃深自幾也次二藐德靈徵失測
曰藐德之失不知畏徵也次三卒而從而卹而悚而于
其心祖測曰卒而從而能自改也次四信過不食至于
側匿測曰信過不食失正祿也次五黃兒以中蕃君子

以之洗于愆測曰黃兒以中過以洗也次六滿其倉蕪
其田食其實不養其根測曰滿倉蕪田不能脩本也次
七疾則藥巫則酌測曰疾藥巫酌禍可轉也次八雌鳴
于辰牝角魚木測曰雌鳴于辰厥正反也上九日月之
逝改于尸測曰改于尸尚不遠也

☵

三方三州
二部一家

劇陰窮大泣陽無介雋離之劇初一骨累

其肉內幽測曰骨累其肉賊內行也次二血出之蝕凶
貞測曰血出之蝕君子傷之也次三酒作失德鬼眩其

室測曰酒作失德不能持也次四食于劇父母采餒若
測曰食劇以若為順祿也次五出野見虛有虎攸豬撻
綉與襦測曰出野見虛無所措足也次六四國滿斯宅
測曰四國滿斯求安宅也次七庶而半而戴禍顏而測
曰庶而半而戴禍較也次八餅纍于緇貞頽測曰餅纍
于緇厥職迫也上九海水羣飛蔽于天杭測曰海水羣
飛終不可語也

䷗ 三方三州
䷗ 二部二家
馴陰氣大順渾沌無端莫見其根初一黃

靈幽貞馴測曰黃靈幽貞順以正也次二蠅其膏女子
之勞不靜亡命測曰蠅膏之亡不能清淨也次三牝貞
常慈衛其根測曰牝貞常慈不忘本也次四徇其勞不
如五之豪測曰徇其勞伐善也次五靈囊大包其德珍
黃測曰靈囊大包不敢自盛也次六囊失括泄珍器測
曰囊失括臣口溢也次七方堅犯順利臣貞測曰方堅
犯順守正節也次八馴非其正不保厥命測曰馴非其
正無所統一也上九馴義忘生賴于天貞測曰馴義忘

生受命必也

☵☵

三方三州
二部三家

將陰氣濟物乎上陽信將復始之乎下初

一將造邪元厲測曰將造邪危作主也次二將無疵元
睪測曰將無疵易為後也次三鑪鈞否利用止測曰鑪
鈞否化內傷也次四將飛得羽利以登于天測曰將飛
得羽其輔彊也次五大爵將飛拔其翮毛羽雖衆不得
適測曰大雀拔翮不足賴也次六日失烈烈君子將衰
降測曰日失烈烈自光大也次七跌舩跋車其害不遐

測曰跌船跋車不遠害也次八小子在淵丈人播船測
曰丈人播船濟溺世也上九紅蠶緣于枯桑其繭不黃
測曰緣于枯桑蠶功敗也



三方三州
三部一家

難陰氣方難水凝地拆陽弱于淵初一難
我冥冥測曰難我冥冥未見形也次二凍冰瀆狂馬楸
木測曰狂馬楸木妄生也次三中堅剛難于非常測曰
中堅剛終莫傾也次四卵破石鰈測曰卵破之鰈小人
難也次五難無間雖大不勤測曰難無間中密塞也次

六大車川川上較于山下觸于川測曰大車川川上下較也次七拔石砢砢力沒以盡測曰拔石砢砢乘時也次八觸石決木維折角測曰觸石決木非所治也上九角解豸終以直其有施測曰角解豸終以直之也

☵

三方三州
三部二家

勤陰凍沍難創于外微陰邸冥膂力于內

初一勤于心否貞測曰勤否貞中不正也次二勞有恩勤慳慳君子有中測曰勞有恩勤有諸情也次三羈角之吾其泣呱呱未得絰杖測曰羈角之吾不得命也次

四勤于力放倍忘食大人有克測曰勤力忘食大人德也次五往蹇蹇禍適福遠測曰往之蹇蹇遠乎福也次六勤有成功幾于天測曰勤有成功天所來輔也次七勞牽不其臯于尾弊測曰勞牽之弊其道逆也次八勞踏踏心爽蒙柴不却測曰勞踏踏躬殉國也上九其勤其勤抱車入淵負舟上山測曰其勤其勤勞不得也

☰

三方三州
三部三家

養陰弼于野陽蓋萬物赤之于下初一藏

心于淵美厥靈根測曰藏心于淵神不外也次二墨養

邪元函否貞測曰墨養邪中心敗也次三糞以肥丘育
厥根芟測曰糞以肥丘中光大也次四燕食扁扁其志
僂僂利用征賈測曰燕食扁扁志在賴也次五黃心在
腹白骨生肉孚德不復測曰黃心在腹上得天也次六
次次一日三餼祇牛之兆肥不利測曰次次之餼肥無
身也次七小子牽象婦人徽猛君子養病測曰牽象養
病不相因也次八鯁不脫毒疾發鬼上壟測曰鯁疾之
發歸于墳也上九星如歲如復繼之初測曰星如歲如

終始養也

跼贊一凍登赤天晏入玄泉測曰凍登赤天陰作首也
羸贊二一虛一羸跼奇所生測曰虛羸跼奇禪無已也

太玄經衝第七

中則陽始應則陰生周復乎德迎逆乎刑殞大戚遇小
願閑孤而竈鄰少微也大肥也戾內反廓外違上觸素
文多故干狂也禮方也狩則來而逃則亡羨私曲唐公
而無欲差過也而常穀童寡有而度無乏增始昌而

永極長銳執一而昆大同達日益其類減日損其彙
交相從也唵不通也更有畏守不可攻僕也出翁也入
從散也而聚集也進多謀積多財釋推也飾衰也格好
也是而疑惡也非夷平而視傾樂上揚沈下藏爭士齊
也內女懷也務則憊而去則悲事尚作晦尚休更變而
共笑曹久而益憂斷多事窮無喜毅敢而割儻裝徙鄉
止不行衆溫柔堅寒剛密不可間成不可更親親乎善闕
闕乎恩斂也得失亡福彊善不倦劇惡不息睟君道也馴

臣保也盛壯將老也居得乎位難遇乎訕法易與天下同也勤苦而無功也養受羣餘君子養吉小人養凶也

太玄經錯第八

中始周旋羨曲毅端晬文之道或淳或班彊也健僎也弱積也多而少也約視也見而晦也瞽童無知盛而有餘去離故而將來初大也外而翕也內疇也進更也退樂佚邊勤蹶蹶達思通窮思索于在朝而內在席差自憎飾自好格不容而昆寬裕增日益而減日損馴奉令

而戾相反釋也柔而堅也剛夷平易而難頡頏斷多決
而疑猶與逃有避爭有趣進欲行止欲驚廓無方務無
二應也今而度也古迎知前永見後從也牽守也固礪
拔難劇無赦唐蕩蕩而閑瘞塞更造新常因故失大亡
斂小得竈好利法惡刻禮也都而居也室聚事虛衆事
實闕也皆合二而密也成用一上志高沈志下交多友
唵少與銳鏘鏘曹割跽親附疏割犯血遇逢難裝候時
事自竭養自茲格也乖而昆也同增有益而減有損成

者功就不可易也

太玄經攤第九

玄者幽攤萬類而不見形者也資陶虛無而生乎規攔神明而定摹通同古今以開類攤措陰陽而發氣一判一合天地備矣天日迴行剛柔接矣還復其所終始定矣一生一死性命瑩矣仰以觀乎象俯以視乎情察性知命原始見終三儀同科厚薄相劑園則杌梘方則嗇宏噓則流體唵則凝形是故闔天謂之宇闢字謂之宙日

月往來一寒一暑律則成物厯則編時律厯交道聖人以謀晝以好之夜以醜之一晝一夜陰陽分索夜道極陰晝道極陽牝牡羣貞以攤吉凶則君臣父子夫婦之道辯矣是故日動而東天動而西天日錯行陰陽更巡死生相掇萬物乃纏故玄聘取天下之合而連之者也綴之以其類占之以其觚曉天下之曠曠瑩天下之晦晦者其唯玄乎夫玄晦其位而冥其眇深其阜而眇其根攘其功而幽其所以然者也故玄卓然示人遠矣曠

然廓人大矣淵然引人深矣渺然絕人眇矣嘿而該之者玄也擇而散之者人也稽其門闢其戶叩其鍵然後乃應况其否者乎人之所好而不足者善也人之所醜而有餘者惡也君子日彊其所不足而拂其所有餘則玄道之幾矣仰而視之在乎上俯而窺之在乎下企而望之在乎前棄而忘之在乎後欲違則不能嘿則得其所者玄也故玄者用之至也見而知之者智也視而愛之者仁也斷而決之者勇也兼制而博用者公也能以

偶物者通也無所繫較者聖也時與不時者命也虛形
萬物所道之謂道也因循無革天下之理得之謂德也
理生昆羣兼愛之謂仁也列敵度宜之謂義也秉道德
仁義而施之之謂業也瑩天功明萬物之謂陽也幽無
形深不測之謂陰也陽知陽而不知陰陰知陰而不知
陽知陰知陽知止知行知晦知明者其唯玄乎縣之者
權也平之者衡也濁者使清險者使平離乎情者必著
乎偽離乎偽者必著乎情情偽相盪而君子小人之道

較然見矣。玄者以衡量者也。高者下之卑者舉之饒者取之罄者與之明者定之疑者提之規之者思也。立之者事也。說之者辯也。成之者信也。夫天宙然示人神矣。夫地他然示人明矣。天地奠位神明通氣。有一有二有三。位各殊輩。回行九區。終始連屬。上下無隅。察龍虎之文。觀鳥龜之理。運諸叅政。繫之泰始。極焉以通璇璣之統。正玉衡之平。圓方之相。研剛柔之相。干盛則人衰。窮則更生。有實有虛。流止無常。夫天地設。故貴賤序。四時

行故父子繼律歷陳故君臣理常變錯故百事拚質文
形故有無明吉凶見故善否著虛實盪故萬物纏陽不
極則陰不萌陰不極則陽不牙極寒生熱極熱生寒信
道致詘道致信其動也日造其所無而好其所新其
靜也日減其所有而損其所成故推之以刻參之以晷
反覆其序軫轉其道也以見不見之形抽不抽之緒與
萬類相連也其上也縣天下也淪淵織也入歲廣也包
吟其道游冥而挹盈存存而亡亡微微而章章始始而

終終近玄者玄亦近之遠玄者玄亦遠之譬若天蒼蒼然在于東面南面西面北面仰而無不在焉及其俛則不見也天豈去人哉人自去也冬至及夜半以後者近玄之象也進而未極往而未至虛而未滿故謂之近玄夏至及日中以後者遠玄之象也進極而退往窮而還已滿而損故謂之遠玄日一南而萬物死日一北而萬物生斗一北而萬物虛斗一南而萬物盈日之南也右行而左還斗之南也左行而右還或左或右或死或生

神靈合謀天地乃并天神而地靈

太玄經瑩第十

天地開闢宇宙拓坦天元咫尺日月紀數周渾歷紀羣
倫品庶或合或離或羸或踦故曰假哉天地啗函啓化
罔裕于玄終始幽明表賛神靈太陽乘陰萬物該兼周
流九虛而禍福絪羅凡十有二始羣倫抽緒故有一二
三以絪以羅玄術瑩之鴻本五行九位施重上下相因
醜在其中玄術瑩之天圜地方極植中央動以歷靜時

乘十二以建七政玄術瑩之斗振天而進日違天而退
或振或違以立五紀玄術瑩之植表施景榆漏率刻昏
明考中作者以戒玄術瑩之冷竹為管室灰為候以揆
百度百度既設濟民不誤玄術瑩之東西為緯南北為
經經緯交錯邪正以分吉凶以形玄術瑩之鑿井澹水
鑽火難木流金陶土以和五美五美之資以資百體玄
術瑩之奇以數陽偶以數陰奇偶推演以計天下玄術
瑩之六始為律六間為呂律呂既協十二以調日辰以

數玄術瑩之方州部家八十一所畫下中上以表四海
玄術瑩之一辟三公九卿二十七大夫八十一元士少
則制衆無則治有玄術瑩之古者不遷不虞慢其思慮
匪筮匪卜吉凶交瀆於是聖人乃作著龜鑽精倚神籍
知休咎玄術瑩之是故欲知不可知則擬之以乎卦兆
測深摹遠則索之以乎思慮二者其以精立乎夫精以
卜筮神動其變精以思慮謀合其適精以立正莫之能
仆精以有守莫之能奪故夫抽天下之蔓蔓散天下之

混混者非精其孰能之夫作者貴其有循而體自然也其所循也大則其體也壯其所循也小則其體也瘠其所循也直則其體也渾其所循也曲則其體也散故不攢所有不彊所無譬諸身增則贅而割則虧故質幹在乎自然華藻在乎人事人事也具可損益歟夫一一所以摹始而測深也三三所以盡終而極崇也二二所以參事而要中也人道象焉務其事而不務其辭多其變而不多其文也不約則其指不詳不要則其應不博不渾

則其事不散不沈則其意不見是故文以見乎質辭以
睹乎情觀其施辭則其心之所欲者見矣夫道有因有
循有革有化因而循之與道神之革而化之與時宜之
故因而能革天道乃得革而能因天道乃馴夫物不因
不生不革不成故知因而不知革物失其則知革而不
知因物失其均革之匪時物失其基因之匪理物喪其
紀因革乎因革國家之矩范也矩范之動成敗之効也
立天之經曰陰與陽形地之緯曰從與橫表人之行曰

晦與明陰陽曰合其判從橫曰緯其經晦明曰別其材
陰陽該極也經緯所遇也晦明質性也陽不陰無與合
其施經不緯無以成其誼明不晦無以別其德陰陽所
以抽嘖也從橫所以瑩理也明晦所以昭事也嘖情也
抽理也瑩事也昭君子之道也往來熏熏得亡之門夫
何得何亡得福而亡禍也天地福順而禍逆山川福庫
而禍高人道福正而禍邪故君子內正而外馴每以下
人是以動得福而亡禍也福不醜不能生禍禍不好不

能成福醜好乎醜好乎醜好君子所以直表也夫福樂
終而禍憂始天地所貴曰福鬼神所祐曰福人道所喜
曰福其所賤在惡皆曰禍故惡福甚者其禍亢晝人之
禍少夜人之禍多晝夜散者其禍福雜

太玄數第十一

昆侖天地而產著參珍睟精三以揲數散幽於三重而
立家旁擬兩儀則觀事逢遭並合揅繫其名而極命焉
精則經疑之事其質乎今曰假太玄假太玄字貞爰質

所疑于神于靈休則逢陽星時數辭從咎則逢陰星時
數時違凡筮有道不精不筮不疑不筮不軌不筮不以
其占不若不筮神靈之神靈之耀曾越卓三十有六而
筮視焉天以三分終於六成故十有八筮天不施地不
成因而倍之地則虛三以扮天十八也別一以挂於左
手之小指中分其餘以三搜之并餘於芳一芳之後而
數其餘七為一八為二九為三六算而筮道窮也逢有
下中上下思也中福也上禍也思福禍各有下中上以

晝夜別其休咎焉極一為二極二為三極三為推推三為贏贊贊贏入表表贏入家家贏入部部贏入州州贏入方方贏則玄一從二從三從是謂大休一從二從三違始中休終咎一從二違三違始休中終咎一違二從三從始咎中終休一違二違三從始中咎終休一違二違三違是謂大咎占有四或星或時或數或辭旦則用經夕則用緯觀始中決從終

三八為木為東方為春日甲乙辰寅卯聲角色青味酸

臭羶形詘信生火勝土時生藏脾侷志性仁情喜事貌
用恭搗肅徵旱帝太昊神勾芒星從其位類為鱗為雷
為鼓為恢聲為新為蹠為戶為牖為嗣為承為葉為緒
為赦為解為多子為出為予為竹為草為果為實為魚
為疏器為規為田為木工為矛為青恠為軌為狂

四九為金為西方為秋日庚辛辰申酉聲商色白味辛
臭腥形革生水勝木時殺藏肝侷魄性誼情怒事言用
從搗又徵雨帝少昊神蓐收星從其位類為毛為醫為

巫祝為猛為舊為鳴為門為山為限為邊為城為骨為
石為環珮為首飾為重寶為大哆為鈎器為舂為椎為
力為縣為燧為兵為械為齒為角為螫為毒為狗為入
為取為罕為履為賊為理為矩為金工為鉞為白恠為
瘠為譖

二七為火為南方為夏日丙丁辰巳午聲徵色赤味苦
臭焦形上生土勝金時養藏肺侑魂性禮情樂事視用
明搗哲徵熱帝炎帝神祝融星從其位類為羽為竈為

絲為網為索為珠為文為駮為印為綬為書為輕為高
為臺為酒為吐為射為戈為甲為叢為司馬為禮為繩
為火工為刀為赤恠為盲為舒

一六為水為北方為冬日壬癸辰子亥聲羽色黑味鹹
臭朽形下生木勝火時藏藏腎俯精性智情悲事聽用
聰搗謀徵寒帝顓頊神玄冥星從其位類為介為鬼為
祠為廟為井為穴為竇為鏡為玉為履為遠行為勞為
血為膏為貪為含為蟄為火獵為閉為盜為司空為法

為准為水工為盾為黑恠為聾為急

五五為土為中央為四維日戊己辰戌丑未聲宮色黃
味甘臭芳形殖生金勝水時該藏心侑神性信情恐懼
事思用睿撫聖徵風帝黃帝神后土星從其位類為其
裸為封為餅為宮為宅為中雷為內事為織為衣為裘
為繭為絮為牀為薦為馴為懷為腹器為脂為漆為膠
為囊為包為輿為輟為稼為畜為食為兵為棺為犢為
衢為會為都為度為量為土工為弓矢為黃恠為愚為

車

五行用事者王王所生相故王廢勝王囚王所勝死

其在聲也宮為君徵為事商為相角為民羽為物其以
為律呂黃鍾生林鍾林鍾生太簇太簇生南呂南呂生
姑洗姑洗生應鍾應鍾生蕤賓蕤賓生大呂大呂生夷
則夷則生夾鍾夾鍾生無射無射生仲呂

子午之數九丑未八寅申七卯酉六辰戌五巳亥四故
律四十二呂三十六并律呂之數或還或否凡七十有

八黃鍾之數立焉其以為度也皆生黃鍾

甲己之數九乙庚八丙辛七丁壬六戊癸五聲生於日律
生於辰聲以情質律以和聲聲律相協而八音生

九天一為中天二為羨天三為從天四為更天五為
辟天六為廓天七為減天八為沈天九為成天

九地一為沙泥二為澤池三為沚崖四為下田五為中
田六為上田七為下山八為中山九為上山

九人一為下人二為平人三為進人四為下祿五為中

祿六為上祿七為失志八為疾癘九為極

九體一為手足二為臂脛三為股肱四為要五為腹六為肩七為啜啍八為面九為顙

九屬一為玄孫二為曾孫三為仍孫四為子五為身六為父七為祖父八為曾祖父九為高祖父

九竅一六為前為耳二七為目三八為鼻四九為口五為後

九序一為孟孟二為孟仲三為孟季四為仲孟五為仲

仲六為仲季七為季孟八為季仲九為季季

九事一為規模二為方沮三為自如四為外他五為中
和六為盛多七為消八為耗九為盡弊

九年一為一十二為二十三為三十四為四十五為五
十六為六十七為七十八為八十九為九十

推玄算家一置一二置二三置三部一勿增二增三三增
六州一勿增二增九三增十八方一勿增二增二十七三
增五十四求表之贊置玄姓去太始策數減而九之增贊

去玄數半之則得贊去冬至日數矣偶為所得日之夜
奇為所明日之晝也求星從牽牛始除算盡則是其日
也

太玄經文第十二

罔直蒙會冥罔北方也冬也未有形也直東方也春也
質而未有文也蒙南方也夏也物之脩長也皆可得而
載也會西方也秋也物皆成象而就也有形則復於無
形故曰冥故萬物罔乎北直乎東蒙乎南會乎西冥乎

北故罔者有之舍也直者文之素也蒙者亡之主也會者生之府也冥者明之藏也罔舍其氣直觸其類蒙極其脩會考其親冥反其與罔蒙相極直會相較出冥入冥新故更代陰陽迭循清濁相廢將來者進成功者退已用則賤當時則貴天文地質不易厥位罔直蒙會冥言出乎罔行出乎罔禍福出乎罔罔之時玄矣哉行則有蹤言則有聲福則有膺禍則有形有形之謂直有直則可蒙也有蒙則可會也可會則反乎冥矣是故罔之時則

可制也八十一家由罔者也天炫炫出於無眇熒熒出於無垠故罔之時玄矣哉是故天道虛以藏之動以發之崇以臨之刻以制之終以幽之淵乎其不可測也矧乎其不可高也故君子藏淵足以禮神發動足以振衆高明足以覆照制刻足以竦凝幽冥足以隱塞君子能此五者故曰罔直蒙會冥或曰昆侖旁薄幽何為也曰賢人天地思而包羣類也昆諸中未形乎外獨居而樂獨思而憂樂不可堪憂不可勝故曰幽神戰於玄何為

也曰小人之心雜將形乎外陳陰陽以戰其吉凶者也
陽以戰乎吉陰以戰乎凶風而識虎雲而知龍賢人作
而萬類同龍出乎中何為也曰龍德始著也陰不極則
陽不生亂不極則德不形君子脩德以俟時不先時而
起不後時而縮動止徽章不失其法者其唯君子乎故
首尾可以為庸也庠虛無因大受性命否何為也曰小
人不能懷虛處乎下庠而不可臨虛而不可滿無而能
有因而能作故大受性命而無辭辟也故否日正於天

何為也曰君子乘位為車為馬車軫馬駢可以周天下
故利其為主也月闕其博不如開明於西何為也曰小
人盛滿也自虛毀者水息淵木消林山殺瘦澤增肥賢
人覩而衆莫知曾曾之包何為也曰仁疾乎不仁誼疾
乎不誼君子寬裕足以長衆和柔足以安物天地無不
容也不容乎天地者其唯不仁不誼乎故水包貞黃不
黃何為也曰小人失刑中也諸一則始諸三則終二者
得其中乎君子在玄則正在福則沖在禍則反小人在

玄則邪在福則驕在禍則窮故君子得位則昌失位則良
小人得位則橫失位則喪八雖得位然猶覆秋長乎顛
靈氣形反何為也曰絕而極乎上也極上則運絕下則顛
靈已顛矣氣形惡得在而不反乎君子年高而極時者
也歟陽極上陰極下氣形乖鬼神阻賢者懼小人怙昆
命旁薄大容也神戰于玄相攻也龍出于中事從也庫
虛之否不公也日正于天光通也月闕其博損羸也會
會之包法乎則也黃不黃失中經也顛靈之反窮天情

也罔直蒙會贊羣冥也昆侖旁薄資懷無方神戰于
玄邪正兩行龍出于中法度文明庠虛之否臣道不
當日正于天乘乾之剛月闕其博以觀消息會會之包
措任乎形德黃不黃不可與即顛靈之反時則有極罔
直蒙會乃窮乎神域天地之所貴曰生物之所尊曰人
人之大倫曰治治之所因曰辟崇天普地分羣偶物使
不失其統者莫若乎辟夫天辟乎上地辟乎下君辟乎
中仰天而天不倦俯地而地不急倦不天急不地倦急

而能乎其事者古今未諸是以聖人仰天則常窮神掘
變極物窮情與天地配其體與鬼神即其靈與陰陽挺
其化與四時合其誠視天而天視地而地視神而神視
時而時天地神時皆馴而惡入乎逆

太玄經祝第十三

玄之贊辭也或以氣或以類或以事之散卒謹問其性
而審其家觀其所遭遇劇之於事詳之於數逢神而天
之觸地而田之則玄之情也得矣故首者天性也衝對

其正也錯紆也測所以知其情攤張之瑩明之數為品
式文為藻飾梲擬也圖象也告其所由往也維天肇降
生民使其貌動口言目視耳聽心思有法則成無法則
不成誠有不威梲擬之經垂綃為衣裳幅為裳衣裳之
示以示天下梲擬之三八比札為甲冠矜為戟被甲何
戟以威不恪梲擬之四九尊尊為君卑卑為臣君臣之
制上下以際梲擬之二七鬼神耗荒想之無方無冬無
夏祭之無度故聖人著之以祀典梲擬之一六時天時

力地力維酒維食爰作稼穡梲擬之五五古者寶龜而
貨貝後世君子易之以金幣國家以通萬民以賴梲擬
之思慮建侯開國渙爵般秩以引百祿梲擬之福越隕
不令維用五刑梲擬之禍秉珪戴璧臚湊羣辟梲擬之
八十一首棘木為杼削木為柚杼柚既施民得以煥梲
擬之經緯剛割匏竹革木土金擊石彈絲以和天下梲
擬之八風陰陽相錯男女不相射人人物物各由厥彙
梲擬之虛羸日月相斛星辰不相觸音律差列竒耦異

氣父子殊面兄弟不孿帝王莫同梲擬之歲噴以牙者
童其角擢以翼者兩其足無角無翼材以道德梲擬之
九日平分存見知隱由適擬遠推陰陽之荒考神明之
隱梲擬之晷刻一明一幽跌剛跌柔知陰者逆知陽者
流梲擬之晝夜上索下索遵天之度往述來述遵天之
術無或改造遵天之醜梲擬之天元天地神胞法易久
而不已當往者終當來者始梲擬之罔直蒙會冥故擬
水於川水得其馴擬行於德行得其中擬言於法言得

其正言正則無擇行正則無爽水順則無敗無敗故久也
無爽故可觀也無擇故可聽也可聽者聖人之極也可觀
者聖人之德也可久者天地之道也是以昔者羣聖人
之作事也上擬諸天下擬諸地中擬諸人天地作函日
月固明五行該醜五嶽宗山四瀆長川五經標矩天違
地違人違而天下之大事悖矣

太玄經圖第十四

一玄都覆三方方同九州枝載庶部分正羣家事事具

中則陰質北斗日月吟營陰陽沈交四時潛處五行伏
行六合既混七宿軫轉馴幽推歷六甲內馴九九實有
律呂孔幽歷數匿紀圖象玄形贊載成功始哉中羨從
百卉權輿乃訊感天雷推徹寧輿物旁震寅贊柔微拔
根于元東動青龍光離于淵摧上萬物天地輿新中哉
更睟廓象天重明雷風炫煥與物時行陰會西北陽尚
東南內雖有應外觝亢貞龍幹于天長類無疆南征不
利遇崩光終哉減沈成天根還向成氣收精閱入庶物

咸首艱鳴深合黃純廣含羣生泰柄雲行時監地營邪
謨高吸乃馴神靈旁該終始天地人功咸奠貞天甸其
道地地其緒陰陽雜廁有男有女天道成規地道成矩
規動周營矩靜安物周營故能神明安物故能類聚類
聚故能富神明故至貴夫玄也者天道也地道也人道
也兼三道而天名之君臣父子夫妻之道玄有一道一
以三起一以三生以三起者方州部家也以三生者參
分陽氣以為三重極為九營是為同本離生天地之經

也旁通上下萬物并也九營周流終始貞也始于十一月終于十月羅重九行行四十日誠有內者存乎中宣而出者存乎羨雲行雨施存乎從變節易度存乎更珍光淳全存乎晬虛中弘外存乎廓消退消部存乎減降隊幽藏存乎沈考終性命存乎成是故一至九者陰陽消息之計邪反而陳之子則陽生於十一月陰終十月可見也午則陰生於五月陽終於四月可見也生陽莫如子生陰莫如午西北則子美盡矣東南則午美極矣

故思心乎一反復乎二成意乎三條暢乎四著明乎五
極太乎六敗損乎七剝落乎八殄絕乎九生神莫先乎
一中和莫盛乎五倨勵莫困乎九夫一也者思之微者
也四也者福之資者也七也者禍之階者也三也者思之
崇者也六也者福之隆者也九也者禍之窮者也二五
八三者之中也福則往而禍則承也九虛設闢君子小
人所為宮也自一至三者貧賤而心勞四至六者富貴
而尊高七至九者離咎而犯菑五以下作息五以上作

消數多者見貴而實索數少者見賤而實饒息與消糺
貴與賤交禍至而福逃幽潛道卑元極道高晝夜相承
夫婦繫也終始相生父子繼也日月合離君臣義也孟
季有序長幼際也兩兩相闔朋友會也一晝一夜然後
作一日一陰一陽然後生萬物晝數多夜數少象月闔
而日溢君行光而臣行滅君子道全小人道闕一與六
共宗二與七共明三與八成友四與九同道五與五相
守玄有一規一矩一繩一準以從橫天地之道馴陰陽

之數擬諸其神明闡諸其幽昏則八方平正之道可得而察也玄有六九之數策用三六儀用二九玄其十有八用乎泰積之要始於十有八策終於五十有四并始終策數半之為泰中泰中之數三十有六策以律七百二十九贊凡二萬六千二百四十四策為太積七十二策為一日凡三百六十四日有半踦滿焉以合歲之日而律歷行故自子至辰自辰至申自申至子冠之以甲而章會統元與月蝕俱沒玄之道也

太玄經告第十五

玄生神象二神象二生規規生三摹三摹生九據玄一
摹而得乎天故謂之有天再摹而得乎地故謂之有地
三摹而得乎人故謂之有人天三據而乃成故謂之始
中終地三據而乃形故謂之下中上人三據而乃著故
謂之思福禍下欲上欲出入九虛小索大索周行九度
玄者神之魁也天以不見為玄地以不形為玄人以心
腹為玄天奧西北鬱化精也地奧黃泉隱魄榮也人奧

思慮含至精也天穹隆而周乎下地旁薄而向乎上人
昏昏而處乎中天渾而攢故其運不已地墮而靜故其
生不遲人馴乎天地故其施行不窮天地相對日月相
劓山川相流輕重相浮陰陽相續尊卑不相躐是故地
坎而天巖月遒而日湛五行迭王四時不俱壯日以昱
乎晝月以昱乎夜昴則登乎冬火則發乎夏南北定位
東西通氣萬物錯離乎其中玄一德而作五生一刑而
作五剋五生不相殄五剋不相逆不相殄乃能相繼也

不相逆乃能相治也相繼則父子之道也相治則君臣
之寶也玄日書斗書而月不書常滿以御虛也歲寧恙
而年病十九年七閏天之償也陽動吐陰靜翕陽道常
饒陰道常乏陰陽之道也天彊健而僑踈一晝一夜自
復而有餘日有南有北月有往有來日不南不北則無
冬無夏月不往不來則望晦不成聖人察乎朧側匿之
變而律乎日月雄雌之序經之於無已也故玄鴻綸天
元婁而柑之於將來者乎大無方易無時然後為神鬼

也神遊乎六宗魂魂萬物動而常沖故玄之辭也沈以窮乎下浮以際乎上曲而端散而聚美也不盡於味大也不盡其彙上連下連非一方也遠近無常以類行也或多或少寡事適乎明也故善言天地者以人事善言人事者以天地明晦相推而日月逾邁歲歲相盪而天地彌陶之謂神明不窮原本者難由流末者易從故有宗祖者則稱乎孝序君臣者則稱乎忠實告大訓

揚子雲集卷二